

«08» նոյեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով մաքսային ձևակերպումների մասնագետ Խաչիկ Սմբատյանի վերաբերյալ նյութերը.

Պ Ա Ր Զ Ե Ց Ի՝

ՀՀ ՊԵԿ հետքացթողումային հսկողության վարչության աշխատակիցները, իրականացրել են կամերալ մաքսային ստուգում «Յունիագրո» ՍՊ ընկերությունում և հայտնաբերել, որ «Յունիագրո» ՍՊ ընկերության անվամբ 08.05.2019թ. թիվ 05100010/080519/0037379 ապրանքների հայտարարագրով ՀՀ ներմուծված և ԵԱՏՄ ԱՏԳ ԱԱ 5305 00 000 0 ծածկագրով հայտարարագրված «Հնդկընկույզի, աբակայի մանրաթելեր (մանիլյան կանեփաթել կամ *Musa textilis* Nee), ճենականեփի, ԿՈԿՈՍԻ ՄԱՆՐԱԹԵԼԵՐ ԲՈՒՅՍԵՐԻ ԱՃԵՑՄԱՆ» ապրանքատեսակը հայտարարագրվել է ծածկագրի վերաբերյալ ոչ ճշգրիտ տեղեկություններով:

ԵՏՀ խորհրդի 16.07.2012թ. N54 որոշմամբ հաստատված հավելվածում ԵԱՏՄ ԱՏԳ ԱԱ 53-րդ խումբը ներառված է XI (մանածագործական նյութեր և մանածագործական արտադրատեսակներ) բաժնում, որի ծանոթագրությունների համաձայն՝ տվյալ բաժնում չեն ընդգրկվում՝ մասնավորապես բամբակի աղվամազը կամ 14-րդ խմբում ընդգրկված բուսական ծագում ունեցող մյուս նյութերը: ԵԱՏՄ ԱՏԳ ԱԱ 53-րդ խմբում ներառված են այլ բուսական մանածագործական մանրաթելերը:

ԵԱՏՄ ԱՏԳ ԱԱ 14-րդ խմբի 1-ին ծանոթագրության համաձայն՝ տվյալ խմբի մեջ չեն ընդգրկվում հետևյալ ապրանքները, որոնք պետք է ընդգրկվեն XI (մանածագործական նյութեր և մանածագործական արտադրատեսակներ) բաժնում՝ բուսական նյութեր կամ մանրաթելեր, որոնք գլխավորապես օգտագործվում են մանածագործական նյութերի արտադրության համար՝ անկախ պատրաստման եղանակից, կամ մշակման ենթարկված այլ բուսական նյութեր՝ բացառապես որպես մանածագործական նյութեր օգտագործելու համար: Մեջբերված ծանոթագրությունը հստակ տարանջատում է բուսական նյութերի կամ մանրաթելերի դասակարգումը՝ տարանջատման հիմքում դնելով նպատակային օգտագործման ոլորտը:

«Յունիագրո» ՍՊ ընկերության ապրանքների հայտարարագրերով հայտարարագրված «Հնդկընկույզի, աբակայի մանրաթելեր (մանիլյան կանեփաթել կամ *Musa textilis* Nee), ճենականեփի, ԿՈԿՈՍԻ ՄԱՆՐԱԹԵԼԵՐ ԲՈՒՅՍԵՐԻ ԱՃԵՑՄԱՆ» ապրանքի նկարագրությունը հաստատում է դրանց մանածագործական նյութ չհանդիսանալու, դրանք որպես բույսեր աճեցնելու (միջավայրի ստեղծման) համար նախատեսված լինելու հանգամանքը, ինչի արդյունքում այն ենթադրվում է, որ ենթակա է դասակարգման ԵԱՏՄ ԱՏԳ ԱԱ 14-րդ խմբում:

ՀՀ ՊԵԿ նախագահի տեղակալի 21.07.2021թ. թիվ Ն/8-2/126357-2021 գրությամբ ներկայացված դիրքորոշմամբ ևս հաստատվել է, որ բուսական նյութերի կամ մանրաթելերի դասակարգումն իրականացվում է տարանջատման հիմքում դնելով ապրանքների ծագումը, նպատակային օգտագործման ոլորտը, որը տվյալ դեպքում բուսական է՝ նախատեսված բույսերի աճեցման (միջավայրի ստեղծման) համար և ենթակա է դասակարգման ԵԱՏՄ ԱՏԳ ԱԱ 1404 ապրանքային դիրքում:

ՀՀ ՊԵԿ մաքսային հսկողության վարչության պետի 05.08.2021թ. «Ապրանքի ոչ ճիշտ դասակարգում հայտնաբերվելու դեպքում ապրանքի դասակարգման վերաբերյալ» թիվ ԱԴՈ-21-000065 որոշմամբ հաստատվել է, որ նշված ԱՀ-ի հայտարարագրված ապրանքները ԵԱՏՄ ԱՏԳ ԱԱ 5305 00 000 00 ծածկագրի (մաքսատուրքի դրույքաչափը 3%, ԱԱՀ-ի դրույքաչափը՝ 0%) փոխարեն ենթակա են հայտարարագրման՝ ԵԱՏՄ ԱՏԳ ԱԱ 1404 90 000 80 ծածկագրով (մաքսատուրքի դրույքաչափը 8%, ԱԱՀ-ի դրույքաչափը՝ 20%):

Իրականացված մաքսային ստուգման արդյունքում 08.09.2021թ. կազմվել է թիվ 0062-Ա ստուգման ակտը և «Յունիագրո» ՍՊ ընկերությանն առաջարկվել է կատարել վերահայտարարագրում ԵԱՏՄ ԱՏԳ ԱԱ ճշգրիտ ծածկագրին համապատասխան՝ վճարելով պակաս վճարված մաքսային վճարները:

Մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար:

Նյութերի ուսումնասիրման արդյունքում պարզվել է, որ թիվ 05100010/080519/0037379 ապրանքների հայտարարագիրը ներկայացրել է Խաչիկ Սմբատյանը: 2021 թվականի սեպտեմբերի 17-ին ՀՀ ՊԵԿ իրավաբանական վարչությունում Խաչիկ Սմբատյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է: 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ:

Օրենսգրքի 20-րդ հոդվածի 1-ին մասի համաձայն՝ հայտարարատուն և այլ անձինք ապրանքների դասակարգումն իրականացնում են ԱՏԳ ԱԱ-ին համապատասխան՝ մաքսային հայտարարագրման ժամանակ և այն դեպքերում, երբ մաքսային կարգավորման ոլորտի միջազգային պայմանագրերի ու ակտերի համաձայն, մաքսային մարմին են հայտնում ապրանքի ծածկագիրը՝ Արտաքին տնտեսական գործունեության ապրանքային անվանացանկին համապատասխան: Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է անվանումը, նկարագրությանը, որն անհրաժեշտ է այն մաքսային վճարների, հատուկ, հակազնազցման, փոխհատուցման տուրքերի և այլ վճարների հաշվարկման և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ունի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ: Ելնելով վերոգրյալից, մաքսային միջնորդի և պատվիրատուի փոխհարաբերությունները կարգավորվում են մաքսային ծառայությունների մատուցման պայմանագրով, որը չի կարող հակասել գործող նորմերին:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

Մաքսային կանոնների խախտումների վերաբերյալ վարույթի շրջանակում հաստատվել է այն հանգամանքը, որ մաքսային ձևակերպումների մասնագետ Խաչիկ Սմբատյանը ապրանքի նկարագրության ուսումնասիրությունից կարող էր պարզել, որ «Հնդկընկույզի, արևելյան մանրաթելեր (մանիլյան կանեփաթել կամ *Musa textilis* Nee), ճենականեփի, ԿՈԿՈՍԻ ՄԱՆՐԱԹԵԼԵՐ ԲՈՒՅՍԵՐԻ ԱՃԵՑՄԱՆ» ապրանքի նկարագրությունը հաստատում է դրանց մանածագործական նյութ չհանդիսանալու, դրանք որպես բույսեր աճեցնելու (միջավայրի ստեղծման) համար նախատեսված լինելու հանգամանքը և պետք է միջոցներ ձեռնարկեր համապատասխան ծածկագրով դասակարգելու համար:

Մաքսային ձևակերպումների մասնագետ Խաչիկ Սմբատյանը 2021 թվականի նոյեմբերի 5-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ «Յունիագրո» ՍՊ ընկերության անվամբ թիվ 05100010/080519/0037379 ապրանքների հայտարարագրով ՀՀ ներմուծված և փաստացի ԵԱՏՄ ԱՏԳ ԱԱ 1404 90 000 80 ծածկագրով հայտարարագրման ենթակա ապրանքները մաքսային ձևակերպումների մասնագետ Խաչիկ Սմբատյանը հայտարարագրել է ոչ ճշգրիտ ԵԱՏՄ ԱՏԳ ԱԱ 5305 00 000 0 ծածկագրով, ինչի հետևանքով առաջացել են 807668 ՀՀ դրամի չափով պակաս հաշվարկված մաքսային վճարներ, այսինքն՝ Խաչիկ Սմբատյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային

կանոնների խախտում, ինչը հիմնավորվում է ՀՀ ՊԵԿ մաքսային հսկողության վարչության 05.08.2021թ. «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» թիվ ԱԴՈ-21-000065 որոշմամբ, ՀՀ ՊԵԿ հետքացթողումային հսկողության վարչության 08.09.2021թ. թիվ 0062-Ո-1 որոշմամբ, 08.09.2021թ. թիվ 0062-Ա ստուգման ակտով, թիվ 05100010/080519/0037379 ապրանքների հայտարարագրով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Խաչիկ Սմբատյանին (անձնագրի համար՝ 003752342) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել 403834 ՀՀ դրամ: /900005024055 (կող-19) հաշվեհամարին/

2. Որոշման մասին հայտնել Խաչիկ Սմբատյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ

ՎԱՐՉՈՒԹՅԱՆ ՊԵՏ՝



Ա. ՄՆԱՑԱԿԱՆՅԱՆ